



Broj: 01,02,03,03/11-05-1-744/26

Sarajevo, 13. 5. 2026.

**KOLEGIJ PREDSTAVNIČKOG DOMA PSBiH  
KOLEGIJ DOMA NARODA PSBiH  
KOLEGIJ SEKRETARIJATA**

**Predmet: Izvještaj s proljetnog sastanka članova Međunarodnog sekretarijata ISP-a u  
Tbilisiju, Gruzija, od 17. do 20. aprila**

U periodu od 17. do 20. aprila 2026. godine, delegacija Predstavničkog doma Parlamentarne skupštine Bosne i Hercegovine, u sastavu poslanika Ljubice Miljanović i Nenada Grkovića, učestvovala je u radu proljetnog sastanka Međunarodnog sekretarijata Interparlamentarne skupštine pravoslavlja (Interparliamentary Assembly on Orthodoxy – IAO), održanog u Tbilisiju, Gruzija.

Sastanku su prisustvovali predstavnici zakonodavnih tijela iz 11 država. Tokom zasjedanja razmatrana su aktuelna pitanja značajna za međunarodnu zajednicu, s posebnim osvrtom na globalnu sigurnost, poštivanje međunarodnog prava, posljedice oružanih sukoba, kao i ulogu religije u savremenim međunarodnim odnosima. Učesnici su istaknuli značaj mirnog rješavanja sporova, unapređenja diplomatskih mehanizama i dosljedne zaštite ljudskih prava. Tom prilikom usvojena je zajednička izjava koja se odnosi na razorne posljedice savremenih sukoba, ulogu religije te položaj Evrope u kontekstu aktuelnih globalnih izazova.

Tokom boravka u Gruziji delegacija je realizirala više bilateralnih susreta s najvišim zvaničnicima države domaćina. Na sastanku s predsjednikom Parlamenta Gruzije Shalvom Papuashvilijem istaknuta je važnost historijskih i kulturnih veza Gruzije s evropskim prostorom, kao i značaj pravoslavlja u očuvanju nacionalnog identiteta. Naglašena je potreba uspostavljanja ravnoteže između očuvanja tradicije i prilagođavanja savremenim društvenim tokovima, uz istovremeno jačanje parlamentarne saradnje.

Poseban segment posjete bio je posvećen obilježavanju 1700 godina od prihvatanja hrišćanstva u Gruziji, što predstavlja događaj od izuzetnog historijskog i kulturnog značaja za ovu zemlju. Delegacija je tom prilikom odala počast patrijarhu Iliji II., ističući njegov doprinos duhovnoj obnovi i očuvanju jedinstva Gruzije.

U okviru radnog dijela sastanka, nakon uvodnih obraćanja predsjednika Parlamenta Gruzije Shalve Papuashvilija, predsjednika Generalne skupštine ISP-a Ioana Vulpescua, te

prezentacije izvještaja generalnog sekretara ISP-a Maximosa Charakopoulou, vođena je rasprava o razornim posljedicama savremenih sukoba, ulozi religije, te položaju vjerskih zajednica u Evropi.

U svom obraćanju poslanica Ljubica Miljanović ukazala je na pitanje zaštite imovine Srpske pravoslavne crkve u Bosni i Hercegovini, s posebnim naglaskom na pravne, identitetske i historijske aspekte ovog pitanja. Istaknuti su zabrinjavajući slučajevi evidentiranja imovine SPC-a kao državnog vlasništva u Federaciji Bosne i Hercegovine, kao i problem neriješene restitucije odnosno nevraćene imovine vjerskih zajednica oduzete tokom perioda socijalističke nacionalizacije.

U raspravi koja je uslijedila učestvovao je i poslanik Nenad Grković, pri čemu su razmatrane mogućnosti djelovanja ISP-a s ciljem pronalaska adekvatnih rješenja za navedena pitanja.

U zajedničkom saopćenju nakon sastanka izražena je zabrinutost zbog flagrantnih kršenja međunarodnog prava i porasta broja oružanih sukoba na globalnom nivou, koji za posljedicu imaju velike ljudske gubitke, raseljavanje stanovništva i materijalna razaranja. Posebna pažnja posvećena je eskalaciji sukoba na Bliskom istoku, kao i nastavku rata u Ukrajini, uz upućen apel za hitno pronalaženje mirnih rješenja.

Učesnici su također izrazili jasno protivljenje zloupotrebi religije kao opravdanja za nasilje, nezakonite aktivnosti i terorizam te iskazali podršku dokumentima Interparlamentarne unije koji afirmiraju ulogu parlamentaraca u rješavanju globalnih kriza.

Na sastanku je razmatrana i priprema 33. zasjedanja Generalne skupštine ISP-a, koje će biti održano u periodu od 17. do 21. juna 2026. godine u Helsinkiju, Finska.

Učešće delegacije Parlamentarne skupštine Bosne i Hercegovine na predmetnom sastanku doprinijelo je daljnjem jačanju međunarodne parlamentarne saradnje, razmjeni stavova o ključnim pitanjima od globalnog značaja te afirmaciji principa dijaloga, mira i dosljednog poštivanja međunarodnog prava u savremenim međunarodnim odnosima.

### **Izvještaj odobrila**

Ljubica Miljanović

### **Izvještaj pripremila**

Olja Golijanin

### Dostaviti:

- naslovu
- Sektoru za međunarodne odnose i protokol
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za odnose s javnošću
- a/a